

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-23-Z/22

Kakanj, 22.11.2022. godine

Z A P I S N I K

**sa 23. redovne sjednice Općinskog vijeća održane 22.11.2022. godine (utorak)
u sali Općinskog vijeća sa početkom u 9:30 sati
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 23. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Safet Šahman, Mejrema Purišević, Mediha Mamela, Izudin Puščul, Omer Musić, Nerma Aliefendić, Elvir Delibašić, Namir Talić, Izudin Hrusto, Adis Mrkonjić, Džemal Bećirhodžić i Aldin Šljivo (**SDA**)

Vinka Aletović, Miroslav Spasojević i Eldin Mijoč (**SDP BiH**)

Mirsad Tursum, Zerina Kovač, Fakir Ajdinović i Sabit Čehajić (**S BiH**)

Dževdet Huskić i Branko Češljčić (**NS**)

Enver Merdić i Mugdin Gorak (**naknadno pristupio**) (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Odsutni vijećnici: Nedim Mušija (**SDA**), Ahmed Begić (**SDP BiH**), Mujo Fafulić (**nacionalna manjina**) i Behija Kulović (**NS**) – **izabrana u Skupštinu ZDK.**

Predsjedavajući je konstatovao da je na sjednici u momentu prijave prisutno 25 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Ferdo Mijač, sekretar Općinskog vijeća

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Mukades Delibašić, pomoćnik općinskog načelnika za imovinskopravne, geodetske poslove i katastar nekretnina

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Zijad Neimarlija, direktor Zavoda za planiranje i izgradnju općine Kakanj

Mahir Sikira, savjetnik općinskog načelnika

Predstavnicima medija

NTV IC Kakanj
Radio Kakanj

Napomene o radu Kolegija Općinskog vijeća

U pripremi 23. redovne sjednice Općinskoga vijeća, Kolegij Općinskog vijeća je 11.11.2022. godine, održao sjednicu na kojoj je razmatrao predstavke i ostale materijale koji su bili proslijeđeni na Kolegij i to:

a) Dostava Informacije po Zaključku Općinskog vijeća, broj: 01/1-20-271/22

Kolegij je Informaciju po Zaključku Općinskog vijeća, broj: 01/1-20-271/22 primio k znanju i dalje proslijedio NGG Park prirode Trstionica i Boriva.

b) Zahtjev MZ Podgora za promjenu naziva u MZ Sopotnica

Kolegij Općinskog vijeća je Zahtjev proslijedio Službi za opću upravu, radne i zajedničke poslove, lokalnu samoupravu i mjesne zajednice na očitovanje.

c) Zahtjev MZ Kakanj II za realizaciju projekta gradskog grijanja u ulici Patrotske lige

Kolegij Općinskog vijeća je Zahtjev proslijedio JP „Grijanje“ d.o.o. Kakanj da u okviru svojih finansijskih i tehničkih mogućnosti udovolji zahtjevu.

d) Inicijativa Udruženja taksista Zeleni val Kakanj za oslobađanje od plaćanja naknade za korištenje javne površine

Kolegij je Inicijativu primio k znanju, obzirom da je nadležna Služba pripremila prijedlog izmjena Odluke koju će Vijeće razmatrati, čime je već pokrenuta proceduru po Inicijativi.

e) Inicijativa Agencije za javne nabavke Sarajevo za uspostavu centralnih nabavnih organa

Kolegij Općinskog vijeća Inicijativu je proslijedio općinskom načelniku, Zavodu za planiranje i izgradnju općine Kakanj, Službi za finansije i Službi za opću upravu, radne i zajedničke poslove, lokalnu samoupravu i mjesne zajednice i na dalje razmatranje i postupanje.

f) Najava obuke vijećnika o temi „Jačanje uloge mjesnih zajednica“ u organizaciji SOGFBiH

Kolegij je zauzeo stav da se vijećnici preko klubova animiraju kako bi ih što više učestvovalo u obuci. Također, Kolegij je tražio da se provjeri mogućnost odgađanja obuke za poslijepodnevnih sati.

Komentari na dostavljene odgovore na vijećnička pitanja

Nije bilo komentara na dostavljene odgovore na vijećnička pitanja.

Komentari na dostavljena mišljenja na vijećničke inicijative

Nije bilo komentara na dostavljena mišljenja na podnesene vijećničke inicijative.

Vijećnička pitanja:

Dževdet Huskić: je postavio dva vijećnička pitanja. Prvo je u kojoj fazi je proširenje vodovodne mreže u MZ Kučići i da li se stanje sa vodosnadbijevanjem u Kučićima popravilo nakon uloženih 126.543,06 KM u junu prošle godine, a drugo je da li se u JP „Grijanje“ Kakanj vodi evidencija pritužbi građana i postoji li način na koji preduzeće mjeri zadovoljstvo korisnika daljinskog grijanja pruženim uslugama?

Armin Bašić: je postavio vijećničko pitanje u kojoj fazi se nalazi rješenje problema poligona za obuku kandidata za vozače motornih vozila, imajući u vidu da su se predstavnici TC Kakanj usaglasili sa predstavnicima auto škola o davanju na korištenje zahtjevanog prostora, te je ostalo da općinske službe obave svoj dio posla, tj da se isti pripremi za navedenu djelatnost?

Mejrema Purišević: je postavila vijećničko pitanje da li je krenula izrada Socijalne karte općine Kakanj, te ako jeste u kojoj fazi je realizacija i do kada se može očekivati završetak izrade pomenutog dokumenta? Ukoliko se nije krenulo sa aktivnostima, koje su prepreke koje uslovljavaju realizaciju projekta?

Predsjedavajući je konstatovao da su vijećnici Elvir Delibašić, Safet Šahman i Namir Talić postavili vijećničko pitanje bez korištenja govornice.

Elvir Delibašić: je postavio vijećničko pitanje kada će se sanirati pružni prelazi preko cesta na potezu Haljinići-Separacija, ako je poznato da je pružni prevoz uglja ukinut i da su uklonjene skoro sve šine na predmetnoj dionici kuda je pruga prolazila?

Safet Šahman: je postavio dva vijećnička pitanja. Prvo pitanje je zašto nije izvršena sanacija klizišta na novoizgrađenom dijelu puta Kakanj – Brnjic i pored obezbijeđenih donatorskih sredstava, a drugo je da li su općinski organi u kontaktu sa prevoznicima autobuskih linija i šta se čini po pitanju obezbjeđenja redovitih autobuskih linija, te da li građane čeka novi problem obustave linijskog prevoza kada nastupi raspust za učenike?

Namir Talić: je postavio vijećničko pitanje kada se može očekivati konkretan potez od strane RMU „Kakanj“ da konačno dođe do povlačenja granice koncesionog polja, o čemu je postignut dogovor prije 3 godine, a što mještani MZ Brnj očekuje?

Vijećničke inicijative

Armin Bašić: je pokrenuo dvije vijećničke inicijative. Prva je za postavljanje adekvatne saobraćajne signalizacije na raskrsnici na kojoj se regionalna cesta R-445 spaja sa industrijskom cestom u blizini tzv. Cementarskog mosta gdje je potrebno postaviti saobraćajnu signalizaciju kojom će se ukazati na put s prvenstvom prolaza, tj. regionalnu cestu označiti znakom za put s prvenstvom prolaza, a industrijsku iz pravca naselja Malješ označiti znakom STOP ili drugim adekvatnim znakom. Druga inicijativa se odnosi na iznalaženje adekvatnog rješenja kako bi se uklonile odbojne ograde postavljene pored slivnika na dionici regionalne ceste R-445 i to u kolovoznoj traci na potezu od Čatića prema pogonu Separacija RMU Kakanj, pri čemu iste sužavaju kolovoznu traku i ometajući mimoilazak teretnih i drugih vozila većih gabarita, te ugrožavaju pješake i bicikliste.

Dževdet Huskić: je pokrenuo dvije vijećničke inicijative. Prva inicijativa je za organizovanje javnih rasprava o Nacrtu budžeta Općine Kakanj za 2023. godinu, po mjesnim zajednicama, s ciljem da se što većem broju stanovništva pruži prilika da iznesu svoje mišljenje o općinskom budžetu. Druga je za dodatno direktno osvjetljavanje pješačkih prelaza zbog jako slabe i neadekvatne javne rasvjetu u gradu, a pogotovo u prigradskim naseljima, gdje je većina pješačkih prelaza skoro pa u mraku od ranih večernjih sati.

Mediha Mamela: je pokrenula inicijativu da se razmotri mogućnost odobravanja i dodjele finansijskih sredstava za angažman logopeda. Predložila je da se logoped angažuje preko Fondacije „Muharem Berbić“ sa čijim predstavnicima je obavljen inicijalni razgovor, a iz razloga što Fondacija već radi sa djecom kojima je potrebna usluga logopeda. Za realizaciju inicijative je potrebno obezbjeđiti finansijska sredstva od cca 700,00 KM na mjesečnom nivou (naknada za rad logopeda, didaktički materijal, grafomotoričke vježbanke i dr.), a sve kako bi se pomoglo roditeljima koji zbog nedostatka logopeda na području općine moraju tražiti usluge logopeda u susjednim općinama i gradovima.

Predsjedavajući je konstatovao da su vijećnici Enver Merdić, Elvir Delibašić, Namir Talić, Safet Šahman, Sabit Čehajić i Adnan Čobo podnijeli vijećničke inicijative bez korištenja govornice.

Enver Merdić: je pokrenuo vijećničku inicijativu da se izvrši zamjena saobraćajnog ogledala na novoj saobraćajnici na dijelu puta gdje se vrši uključenje iz pravca Plandišta, na kojem mjestu je postavljeno okruglo ogledalo koje ne daje dovoljno preglednosti, pa je isto potrebno zamijeniti i postaviti kvadratno ogledalo.

Elvir Delibašić: je pokrenuo vijećničku inicijativu da se sanira put u MZ Bjelavići u naselju Obre i to od samoposluge kroz cijelo naselje Obre do izlaza kod firme "Sim Komerc".

Namir Talić: je pokrenuo vijećničku inicijativu za povremeno zimsko održavanje puta u zaseoku Trešnje u MZ Brnj koji je udaljen 1.300 metara od glavne ceste, pa je u zimskom periodu mještanima jako otežan saobraćaj obzirom da je cesta neprohodna.

Safet Šahman: je pokrenuo dvije vijećničke inicijative. Prva je da se izvrši sanacija dijela puta u mjestu Kondžilo oštećenog u elementarnim nepogodama 2014. godine, a iz razloga bezbjednosti saobraćaja. Druga inicijativa se odnosi na uklanjanje nagomilanog kamenja na dijelu puta Kakanj – Brnjic na lokaciji „Niski most“, gdje se često dešavaju izlivi rijeke što za posljedicu ima prekid saobraćaja, te je potrebno očistiti nagomilano kamenje i produbiti korito rijeke.

Sabit Čehajić: je pokrenuo vijećničku inicijativu za adekvatno obilježavanje spomen obilježja za 72 šehida na području Brnjica, odnosno postavljanje jarbola sa zastavom države Bosne i Hercegovine.

Adnan Čobo: je pokrenuo dvije vijećničke inicijative. Prva je za očitovanje JP „Grijanje“ Kakanj po zahtjevu stanovnika ulice Patriotske lige i njihovog zahtjeva za proširenje mreže daljinskog grijanja, a druga je da se razmotri mogućnost izgradnje kružnog toka na Regionalnoj cesti u blizini tzv. Cementarskog mosta, na ulazu u Kakanj iz pravca Zenice, a iz razloga vrlo velikog intenziteta saobraćaja, opasnost od nesretnog slučaja, te povećanje bezbjednosti učesnika u saobraćaju.

Utvrđivanje dnevnog reda:

Predsjedavajući je za 23. redovnu sjednicu predložio dnevni red koji je usaglašen na sjednici Kolegija.

U diskusiji o dnevnom redu nije niko učestvovao i isti je usvojen jednoglasno sa 23 glasa ZA.

Usvojeni dnevni red:

1. Nacrt budžeta Općine Kakanj za 2023. godinu
2. Nacrt odluke o izvršavanju budžeta Općine Kakanj za 2023. godinu
3. Izvještaj o izvršenju Budžeta Općine Kakanj za period 01.01-30.09.2022. godine
4. Prijedlog odluke o utvrđivanju javnog interesa (Doboj)
5. Prijedlog odluke o utvrđivanju javnog interesa (Rudstroj)
6. Prijedlog odluke o izmjeni i dopuni Tarifnika o visini naknade za korištenje javnih površina
7. Prijedlog odluke o izmjenama i dopunama Odluke o načinu plaćanja nakande za troškove postupka izdavanja akata iz oblasti urbanizma i imovinskopravnih poslova
8. Prijedlog rješenja o konačnom imenovanju predsjednika i članova UO JU Centar za socijalni rad Kakanj
9. Prijedlog rješenja o konačnom imenovanju predsjednika i članova NO JU Centar za socijalni rad Kakanj

Predsjedavajući je predložio da se objedini rasprava po tačkama 1. i 2. dnevnog reda, a da se glasanje obavi pojedinačno.

1. Nacrt budžeta Općine Kakanj za 2023. godinu

2. Nacrt odluke o izvršavanju budžeta Općine Kakanj za 2023. godinu

Predlagač: općinski načelnik

Obrađivač: Služba za finansije

Izvestilac: Džihad Berbić, pomoćnik općinskog načelnika

U diskusiji je učestvovao Dževdet Huskić.

Dževdet Huskić: je rekao da se iz Nacrta budžeta ne vidi opredjeljenje Općine da se uvažavaju sugestije uočene prikom revizije, a koje se odnose na poslovanje Zavoda za planiranje i izgradnju i njegovo

uvođenje u trezorsko poslovanje. Kazao je da bi volio, ukoliko je to moguće, da se u Nacrtu nalaze i programi koje Vijeće usvaja nakon što bude usvojen budžet, zašto postoje primjeri u nekoliko općina. Sve to s ciljem da se građani prikom provođenja javne rasprave izjasne o programima, odnosno projektima koji se planiraju realizirati i da se oni mogu opredjeljivati i davati prioritete određenim projektima. Na kraju je podsjetio na istaknuto opredjeljenje Općine da se plaće u JU „Mladost“ povećavaju 10% tri godine uzastopno, što je učinjeno u prethodne dvije godine, dok je u ovoj godini planirano linearno povećanje plaća u svim JU u visini od 5 %. Predložio je da se u tom pogledu nešto učini ukoliko postoji mogućnost, jer smatra da zahtjevi organa JU „Mladost“ nisu nerealni.

Džihad Berbić (odgovor): je podsjetio da se u budžetu nalaze značajna namjenska sredstva, koja se moraju trošiti u skladu sa odgovarajućim zakonskim odredbama, kao i da se tu nalaze sredstva za poslovanje tri JU koje su uvedene u trezorsko poslovanje, tako da su i ta sredstva praktično namjenskog karaktera, a sve u kontekstu planirane veličine budžeta. Naglasio je da, bez obzira na veličinu budžeta, sve želje i zahtjeve nije moguće uzeti u obzir. U vezi povećanja plaća u JU „Mladost“ je rekao da će se o tome još razmisliti do utvrđivanja prijedloga budžeta, kao i da je na tom polju moguće djelovati i tokom godine kada se budu radili rebalansi, jer je za očekivati da će prihod od PDV-a biti veći od planiranog, pa će ta sredstva biti moguće naknadno usmjeravati u željene rashode. U vezi sugestije oko uvođenja Zavoda u trezorsko poslovanje je rekao da se Općina drži rokova iz revizije, te da taj posao nije jednostavan jer traži izmjenu organizacije i još niz promjena u sistemu funkcionisanja organa uprave. Naglasio je da je Općina Kakanj u mnogo čemu ispred drugih općina, pa tako i u implementaciji trezorskog poslovanja, pri čemu je značajno da 80 % općina nisu uopće krenuli sa implementacijom trezorskog poslovanja. Po pitanju prijedloga da se u budžetu nalaze i programi koje Vijeće naknadno usvaja je rekao da je to moguće uraditi, ali je u tom slučaju izrada budžeta mnogo složenija i svakako nije moguće to realizovati u 2023. godini, možda u nekom narednom periodu.

Nakon diskusije Vijeće je usvojilo Nacrt budžeta Općine Kakanj za 2023. godinu, sa 20 glasova ZA, 3 glasa PROTIV i 2 glasa UZDRŽAN i Zaključak o provođenju javne rasprave u trajanju od 15 dana u periodu 23.11-07.12.2022. godine, sa 18 glasova ZA, 3 glasa PROTIV i 2 glasa UZDRŽAN, te Nacrt odluke o izvršavanju budžeta Općine Kakanj za 2023. godinu, sa 19 glasova ZA, 3 glasa PROTIV i 4 glasa UZDRŽAN.

3. Izvještaj o izvršenju Budžeta Općine Kakanj za period 01.01-30.09.2022. godine

Predlagač: općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

U diskusiji je učestvovao Dževdet Huskić.

Dževdet Huskić: je postavio pitanje kakva se očekuje dinamika u utrošku sredstava iskazanog suficita od oko 5 miliona KM, od čega su 4 miliona KM namjenskih sredstava i oko 1 milion nenamjenskih, odnosno kakvi su planovi i ideje u tom pogledu. Još je pitao zašto je Služba CZ na samo 32% izvršenja sredstava za devet mjeseci 2022. godine.

Džihad Berbić (odgovor): je naglasio da se radi o presjeku stanja na kraju trećeg kvartala i da prikazano stanje nije potpuno relevantno. Što se tiče namjenskih sredstava rekao je da su ona uplaćena i da su u toku javne nabavke, pa zbog toga većina tih sredstava neće biti utrošena do kraja godine, to se prije svega odnosi na ski lift na Ponijerima i most u Modrinju. Po pitanju iskazanog suficita od 1 milion nenamjenskih sredstava je rekao da je taj iznos relativan, te da će se tek po izradi završnog računa vidjeti stanje eventualnog suficita kada će se moći govoriti o utrošku istog. Napomenuo je da je u nekim ranijim godinama bilo iskazanog budžetskog deficita, pa bi se ta sredstva mogla eventualno usmjeriti i na saniranje tog iznosa, te je podsjetio da je u Nacrtu budžetu za 2023. godinu, planirano saniranje deficita iz ranijih godina.

Nakon diskusije Vijeće je usvojilo Zaključak o prihvatanju Izvještaja o izvršenju Budžeta Općine Kakanj za period 01.01-30.09.2022. godine, sa 18 glasova ZA, 3 glasa PROTIV i 5 glasova UZDRŽAN.

Predsjedavajući je predložio da se objedini rasprava po tačkama 4. i 5. dnevnog reda, a da se glasanje obavi pojedinačno.

4. Prijedlog odluke o utvrđivanju javnog interesa (Doboj)

5. Prijedlog odluke o utvrđivanju javnog interesa (Rudstroj)

Predlagač: općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 25 glasova ZA usvojilo Odluku o utvrđivanju javnog interesa (Doboj) i jednoglasno sa 23 glasa ZA, Odluku o utvrđivanju javnog interesa (Rudstroj).

6. Prijedlog odluke o izmjeni i dopuni Tarifnika o visini naknade za korištenje javnih površina

Predlagač: općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji nije niko učestvovao i Vijeće je jednoglasno sa 24 glasova ZA usvojilo Odluku o izmjeni i dopuni Tarifnika o visini naknade za korištenje javnih površina.

7. Prijedlog odluke o izmjenama i dopunama Odluke o načinu plaćanja nakande za troškove postupka izdavanja akata iz oblasti urbanizma i imovinskopravnih poslova

Predlagač: općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji nije niko učestvovao i Vijeće je jednoglasno sa 23 glasa ZA usvojilo Odluku o načinu plaćanja nakande za troškove postupka izdavanja akata iz oblasti urbanizma i imovinskopravnih poslova.

Predsjedavajući je predložio da se objedini rasprava po tačkama 8. i 9. dnevnog reda, a da se glasanje obavi pojedinačno.

8. Prijedlog rješenja o konačnom imenovanju predsjednika i članova UO JU Centar za socijalni rad Kakanj

9. Prijedlog rješenja o konačnom imenovanju predsjednika i članova NO JU Centar za socijalni rad Kakanj

Predlagač: Komisija za izbor u regulirane organe

Obrađivač: Stručna služba za poslove Općinskog vijeća

Izjavitelj: Mediha Mamela, predsjednica Komisije za izbor i imenovanja

Mediha Mamela: je predložila Upravni odbor JU Centar za socijalni rad Kakanj, u sastavu: Samir Husika – predsjednik, Mehmedalija Velispahić – član i Nataša Šarić – član, te Nadzorni odbor JU Centar za socijalni rad Kakanj, u sastavu: Eldina Kovač – predsjednica, Emir Šljivo – član i Ema Petrović – član.

U diskusiji nije niko učestvovao pa je Vijeće sa 16 glasova ZA, 1 glas PROTIV i 8 glasova UZDRŽAN usvojilo Rješenje o konačnom imenovanju predsjednika i članova UO JU Centar za socijalni rad Kakanj, u sastavu: Samir Husika – predsjednik, Mehmedalija Velispahić – član i Nataša Šarić – član, dok prijedlog rješenja za predsjednika i članova NO JU Centar za socijalni rad Kakanj nije dobio potrebnu većinu sa 15 glasova ZA, 1 glas PROTIV i 8 glasova UZDRŽAN.

Predsjedavajući je uputio čestitku povodom 25. Novembra – Dana državnosti BiH i zaključio rad 23. redovne sjednice Općinskog vijeća u 10:35 sati.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić